

Odluka o organiziranju općinskih izbora u općini Žepče

Koristeći se ovlaštenjima koja su mi data članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja pomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem Visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

Pozivajući se na stav XI.2 Zaključaka Vijeća za implementaciju mira koje se sastalo u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim”, u vezi sa određenim pitanjima, uključujući (u skladu sa tačkom (c) ovog stava) i “mjere u svrhu obezbjeđenja implementacije Mirovnog sporazuma na čitavoj teritoriji Bosne i Hercegovine i njenih entiteta”;

Shvatajući hitnu potrebu da se osigura demokratski izbor općinskih struktura u općini Žepče;

Konstatirajući da je Parlamentarna skupština Bosne i Hercegovine donijela Izborni zakon Bosne i Hercegovine (“SG BiH”, br. 23/01);

Imajući na umu član 9. Odluke Visokog predstavnika od 6. oktobra 2000. godine o integraciji općine Žepče (“SN Federacije

BiH", br. 44/00) i Konačnu odluku Visokog predstavnika od 30. novembra 2001. godine o integraciji općine Žepče ("SN Federacije BiH", br. 56/01);

Nadalje imajući na umu Zaključak Prijelaznog općinskog odbora općine Žepče br. 01-05-48/02 od 1. februara 2002. godine;

Uzimajući u obzir napredak postignut u realizaciji prethodno pomenute Odluke Visokog predstavnika od 6 oktobra 2000. godine;

Imajući u vidu sve prethodno pomenuto, ovim donosim slijedeću;

ODLUKU

O ORGANIZIRANJU OPĆINSKIH IZBORA

U OPĆINI ŽEPČE

1. Općinski izbori u Žepču održavaju se istoga dana i u sklopu predstojećih Općih izbora u Bosni i Hercegovini, a organizira ih Izborna komisija Bosne i Hercegovine u skladu sa Izbornim zakonom Bosne i Hercegovine. Izborna komisija odgovorna je za sve tehničke aspekte organizacije i realizacije općinskih izbora u Žepču.
2. Mandat vijećnika izabranih na predstojećim općinskim izborima u Žepču ističe istoga dana kada ističe mandat općinskih vijećnika izabranih na prošlim izborima u svim ostalim općinama.

3. Općinski izbori u općini Žepče finansirat će se iz općinskog budžeta.
4. Neposredno nakon izbora novog Općinskog vijeća, Prijelazni općinski odbor koji je uspostavljen Odlukom Visokog predstavnika o integraciji općine Žepče ("SN Federacije BiH", br. 44/00) prenosi prava, dužnosti i odgovornosti na novoizabrane organe i prestaje da postoji nakon održavanja prve sjednice novog Općinskog vijeća.
5. Ova odluka stupa na snagu odmah i bit će objavljena odmah u "Službenim novinama Federacije Bosne i Hercegovine".

Sarajevo, 3. april 2002

Wolfgang Petritsch

Visoki predstavnik